

समे — 12:25

<><><><><>

एह आकाशवाणी जम्मू ऐ. हुन तुस जगमोहन शर्मा कोला खबरां सुनो।

## President Padma Awards

राष्ट्रपति द्रौपदी मुर्मू होर अज्ज राष्ट्रपति भवन च दुए सिविल अलंकरण समारोह च पद्म पुरस्कार भेंट करगन। मुल्खै दे सर्वोच्च नागरिक पुरस्कारें चा इक पद्म पुरस्कार त्रुं श्रेणिएं च दित्ते जंदे न—पद्म विभूषण, पद्म भूषण ते पद्म श्री। एह पुरस्कार कला, सामाजिक कम्म, सार्वजनिक क्षेत्र च योगदान, विज्ञान ते इंजीनियरिंग, बपार ते उद्योग, चिकित्सा, साहित्य ते शिक्षा, खेड्ड ते प्रशासनिक सेवा समेत बक्ख-बक्ख विषयें ते क्षेत्रें च दित्ते जंदे न।

<><><><><>

## CM-Planing Meeting

मुख्यमंत्री उमर अब्दुल्ला होरें डेटा विश्लेषण च जिला सतह पर लौहकी अवधि आले लक्ष्य तैह करने दी जरूरतै पर जोर दित्ता ऐ जेहड़े हर जिले दिएं मकामी ते टकोहदी जरूरतें पर आधारित होए। सिविल सचिवालय श्रीनगर च योजना विकास ते निगरानी बारे लोआई गेदी इक व्यापक जायजा बैठक दरान सरकार दिएं त्रुं महतव आली पैहलकदमिएं बारे तफसीली पेशकारी कीती गई जिंदे च लक्ष्य समन्वय केन्द्र, जिला घरेलू उत्पाद ते जिला सुशासन इंडेक्स शामिल न। बैठका गी संबोधत करदे होई मुख्यमंत्री होरें आखेआ किजिस चीज दी हुन असेंगी लोड ऐ ओ ऐ लक्ष्य आधारित जिला सतह दी योजना तैआर करना जेहदे च उस जिले दी पूरी समर्थ दा पता लाना ते उस समर्थ दा पूरा पूरा इस्तेमाल करने बश्कार दे छिंडे गी खत्म करना शामिल होग। उनें आखेआ जे एह लौहके लौहके लक्ष्य असें गी 2047 तगर जम्मू कश्मीर गी बी इक विकसित प्रदेश बनाने दे सुखने गी मूर्त रूप देने च मददगार साबत होंगन। मुख्य सचिव अटल डुल्लू ते होरने मैहकमे दे केई बड्डे अफसर बी इस बैठका च मजूद हे।

<><><><><>

## APD

भारत दे बहुदलीय प्रतिनिधिमंडल बक्ख-बक्ख मुल्खें दा दौरा लाइयै आतंकवाद गी बिंद बी बर्दाश्त नेई करने आले भारत दे सनेए गी जारी रखदे होई वैश्विक सतह पर पाकिस्तान आस्सेआ आतंकवाद गी दित्ते जा'रदे समर्थन दा पर्दाफाश करा करदे न। फ्रांस च सर्वदलीय प्रतिनिधिमंडल दी अगुवाई करा'रदे बीजेपी दे सांसद रवि शंकर होरें आखेआ जे भारत आतंकवाद खिलाफ अपनी लड़ाई च इकजुट्ट होइयै खडोते दा ऐ। कांग्रेस सांसद शशि थरूर हुंदी अगुवाई च इक सर्वदलीय प्रतिनिधिमंडल दे मिंबर बीजेपी सांसद तेजस्वी सूयां होरें गुयाना दी राष्ट्रीय असेंबली दे अध्यक्ष कन्ने गल्लबात च पाकिस्तान आस्सेआ अंजाम दित्ते गेदे आतंकवादी हमलें बारे जानकारी दित्ती। बीजेपी सांसद वैजयंत पांडा हुंदी अगुवाई च इक सर्वदलीय प्रतिनिधिमंडल कुवैत गेदा हा जिसलै के जेडी(यू) दे सांसद संजय झा हुंदी अगुवाई च इक प्रतिनिधिमंडल नै आतंकवाद खिलाफ भारत दे पक्के धेइयै गी उजागर करने लेई दक्खन कोरिया

दा दौरा लाया। इस दरान भारत दे आतंकवाद गी उक्का बर्दाश्त नेई करने आले रौंह गी सारें दा समर्थन हासल होआ करदा ऐ।

<><><><><><>

## DC Jammu SANJAY

जम्मू दे जिला विकास कमीशनर सचिन कुमार वैश्य होरें कल श्री अमरनाथ जी दी यात्रा-2025 लेई कीती जा'रदिऐ तैआरिएं दी समीक्षा लेई कल इक बैठक सददी जेह्दा मकसद यात्रा च शामिल सब्बने मैहकमे ते धड़े बश्कार नेडमा तालमेल जकीनी बनाना हा तां जे इस सलाना आयोजन गी पूरी चाल्ली रमानदारी, सुरक्षत ते बवस्था आले ढंगे सिर तोड़ चाढ़ेआ जाई सकै। जिनें परमुख विषे पर बैठका च गल्लबात कीती गेई उंदे च सुरक्षा, ट्रैफिक प्रबंधन, यात्रुएं दे ठैहरने दी बवस्था, साफ सफाई, यात्रा रजिस्ट्रेशन, अगग लगने जां कुसै माड़ी घटना दी सूरतै च तुरत कारवाई दे इंतजाम बगैरा शामिल रेह। डीसी होरें सरबंघत मैहकमे ते अधिकारिएं गी जोर देइयै आखेआ जे हर तैआरी ते कारवाइयां यात्रा लेई तैह्शुदा नियमें कायदें मूजब ते मजूदा हालात ते जरूरतें गी ध्यानै च रखदे होई कीतियां जान।

<><><><><><>

## DC Udhampur

उधमपुर दियां जिला विकास कमीशनर सलोनी राय होरें धरती आबा जनजातीय ग्राम उत्कर्ष अभियान तैहत औंदे 17 लाइन विभागें च 25 सूचकें च 100 प्रतिशत लक्ष्य गी हासल करने लेई तैआरिएं दी समीक्षा करने लेई कल इक बैठक सददी। ध्यानजोग पे जे उधमपुर जिले च एह अभियान 15 जून कोला लेइयै 30 जून 2025 तगर चलाया जा करदा ऐ। बैठक गी संबोधत करदे होई डीसी होरें दस्सेआ जे इस सिलसिले च सरकार दिऐं सेवाएं गी लोकें तगर पजाने लेई कैंपें दरान इक्कै थाहर सिंगल विंडो सुविधा उपलब्ध कराई जाग। धरती आबा जनजातीय ग्राम उत्कर्ष अभियानद 1 लख्य भारत सरकार दे 17 मंत्रालयें आस्सेआ 25 बक्ख-बक्ख दखलें राएं, जनजातीय समाज च बुनियादी ढांचें, सेहत, शिक्षा, कम्म रोजगार दे क्षेत्र च बनी दी पछाड़ गी खत्म करना ऐ।

<><><><><><>

## IPL

आईपीएल टी-20 क्रिकेट च कल रातीं जयपुर च पंजाब किंग्स नै मुंबई इंडियन्स गी हराइयै शीर्ष 2 च थाहर बनाई लैती ऐ। एह्दे कन्नै गै पंजाब नै पैहले क्वालीफायर च अपनी थाहर पक्की करी लैती ऐ। पैहले बल्लेबाजी करदे होई मुंबई इंडियन्स नै पंजाब गी 184 रंज दा लक्ष्य दित्ता जेह्दे परते च पंजाब किंग्स नै 9 गेंदा बाकी रौंहदे 187 रंज बनाइयै मकाबला जित्ती लैता। प्रतियोगिता च अज्ज लखनऊ सुपर जायंट्स दा सामना रॉयल चैलेंजर्स बैंगलुरु कन्नै होग, एह मैच संजा साढ़े 7 बजे थमां लखनऊ च खेड़डेआ जाग।

<><><><><><>

## Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर—अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उपपर 15 जून 2025 थवां पैहले—पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>

Read by Jagmohan Sharma

Composed Mukesh Gupta

Editor Kunal Shrivatsa

Skilled Rajat